

金匱要略編注

張仲景金匱要畧卷十四

構李沈明宗日南甫編註

水氣

師曰、病有風水、有皮水、有正水、有石水、有黃汗、
此明浮腫則一、但有表裏陰陽虛實風寒濕熱之
殊、故立五名爲之大綱、而脉證標本變化之微、詳
悉諸篇、

風水其脉自浮、外證骨節疼痛惡風、皮水其脉亦浮、
外證胕腫、按之沒指、不惡風、其腹如鼓、不渴、當發其
汗、正水其脉沉遲、外證自喘、石水其脉自沉、外證腹

滿不喘黃汗其脉沉遲身發熱胸滿四肢頭面腫久不愈必致癰膿

此分辦四水黃汗脉證也風傷於衛衛盛風微氣強致腫故爲風水邪居氣分其脉自浮衛受風邪不與管和身腫而骨節疼痛邪在肌表則惡風也夫肺之皮毛受邪抑鬱肺衛之氣不利身腫而爲皮水邪傷皮毛其脉亦浮外證肘腫按之沒指者乃氣凝皮膚爲腫但鬆軟不堅耳軀殼受病故不渴邪鬱氣強非風主病而不惡風其腹如鼓乃言滿之甚矣然風皮二水邪皆在表俱當發汗開鬼

門○之○法○也○正○水○者○因○房○勞○汗○出○或○風○或○寒○感○入○腎○
間○鬱○遏○真○陽○不○宜○則○胃○關○不○利○外○水○聚○胃○氣○逆○泛○
溢○皮○膚○爲○腫○裏○氣○上○逆○則○喘○寒○盛○陽○虛○故○脉○沉○遲○
乃○腎○虛○爲○本○受○邪○爲○標○也○蓋○內○經○闡○明○房○勞○受○風○
致○腫○而○爲○風○水○乃○邪○感○於○氣○分○而○屬○陽○爲○熱○金○匱○
補○發○寒○邪○傷○於○精○血○而○屬○陰○爲○寒○或○有○風○寒○兩○傷○
精○氣○所○致○而○寒○熱○虛○實○又○當○以○脉○證○辨○之○有○不○因○
外○邪○而○內○傷○腎○中○真○陽○不○能○鎮○攝○陰○水○泛○濫○皮○膚○
而○腫○者○是○爲○虛○寒○元○氣○傷○敗○之○證○不○在○此○列○然○不○
惟○風○寒○二○邪○致○腫○卽○暑○濕○燥○火○皆○能○入○腎○爲○腫○良○

工須在臨證參詳寒熱而治之凡脾胃濕盛內傷
真陽土濕流於小腹之間與肝腎陰氣凝結堅硬
如石謂之石水陰邪下結而不上干其脉亦沈故
外證腹但滿而不喘也黃汗者乃入水致傷心營
營衛兩凜故脉沈遲陽氣壅逆則身發熱邪鬱上
焦而爲胸滿陽氣不運則四肢頭面腫營血受邪
濕熱相蒸營氣外越故黃汗出久而不愈營衛壅
極必致惡瘡而腐潰難膿也

脉浮而洪浮則爲風洪則爲氣風氣相搏風強則爲
癰疹身體爲癢癢者爲泄風久爲痲癩氣強則爲水

難以俛仰、風氣相繫、身體洪腫、汗出乃愈、惡風則虛、此爲風水、不惡風者小便通利、上焦有寒、其口多涎、此爲黃汗、

此風水痲癩黃汗、同見浮洪之脉、而以證辨也、浮爲風邪在表、洪爲裏氣有餘、然氣有餘便是火、而外風傷衛、風火相搏於肌肉之間、故脉浮而洪、但浮洪之脉、當辨風氣之強弱、乃強者而爲主病、故風強侵於肌肉、則發癰疹而不病、水因風性輕揚而主動、與內火相繫、故身體爲痿、痿者膚腠不密、陽氣疎泄、汗出津傷、故爲泄風、久而不愈、氣血兩

痺營衛熱腐蒸腐爲蟲乃成痂癩而變癘風矣若
內氣強於風而化火是氣爲主病然氣雖強則邪
正合而不去以致風火相搏壅塞決瀆之道不行
水卽橫行於皮膚之間肺氣鬱化而爲水故曰氣
強則爲水若壅逆之極則難以俛仰風氣相繫身
體洪腫言水成而腫之甚矣邪尚在表卽當汗出
乃愈但傷風則惡風而爲表虛曰惡風則虛當從
虛而不從風治以此括上文故謂風水也若脉浮
而洪身體但腫而不惡風是非風強主病乃水濕
壅逆所致小便通利者衛氣不爲邪阻是水傷上

焦○營○氣○主○病○謂○上○焦○有○寒○胸○既○有○寒○津○液○不○利○則○
化○而○爲○涎○所○以○其○口○多○涎○蒸○腐○營○血○外○越○而○爲○黃○
汗○矣○

寸口脉沉滑者、中有水氣、面目腫大、有熱、名曰風水、
視人之目窠上微擁、如蠶新臥起狀、其頸脉動、時時
欬、按其手足上、陷而不起者、風水、

首云其脉自浮、乃言風水始起之脉也、次云脉浮
而洪、乃言風挾內氣化火也、此云寸口沉滑、中有
水氣者、乃示風邪合水、原有傳於肌肉胃脘之裏、
但消爲風入於血、是非裏水之謂、仲景恐人悞認、

爲正水故以面目腫大有熱而別之要知正水是不發熱此發熱者經謂面腫曰風之風水耳目窠者卽目眶之下脾胃所屬鼻頰精明穴之處蓋濕氣通於脾胃風氣通於肝風性上行土濕從之上逆於面則目窠上微擁如蠶新臥起狀頸乃足陽明人迎之脉風入於胃上逆氣鼓其頸脉動邪衝於肺時時欬也然風水逆於肌肉則浮虛鬆軟不堅故按其手足上陷而不起則爲風水若腹大按之而不陷者乃邪在臟腑不在軀殼若皮急腹硬是屬鼓脹矣

太陽病、脉浮而緊、法當骨節疼痛、反不疼、身體反重、而痠、其人不渴、汗出即愈、此爲風水、惡寒者、此爲極虛、發汗得之、渴而不惡寒者、此爲皮水、身腫而冷、狀如周痺、胸中窒、不能食、反聚痛、暮躁不得眠、此爲黃汗、痛在骨節、欬而喘、不渴者、此爲脾脾當腫、發汗則愈、然諸病此者、渴而下利、小便數者、皆不可發汗、

此見太陽脉證、而有風水、皮水、黃汗、肺脹之別也、凡病在表、皆該太陽皮毛二氣所司、此見太陽脉證、當別風邪傷衛爲風水、寒邪侵皮爲皮水、入水

傷於心屬之營爲黃汗風寒傷鬱肺氣爲肺脹也
蓋太陽寒傷營經絡受邪見脉浮而緊則當頭疼
身熱骨節疼痛此不疼身體反重而痠是非極寒
傷經之正傷寒也此浮爲風緊挾寒因風寒抑鬱
肺與膀胱腠理之氣氣強挾風營衛不利合水則
體重合風則重而痠故爲風水風邪在表其人
渴所當發汗卽愈若惡寒者乃治他病發汗傷陽
水泛爲腫曰極虛發汗得之當從虛治不可以風
水之常法也若見前脉證渴而不惡寒者乃寒鬱
皮毛之氣卽靈樞謂膚脹寒氣客於皮膚之間瑩

瑩然不堅、邪氣在於皮毛、營衛之氣凝滯、故身腫而冷、內無寒水泛溢、但顯皮膚腫脹、浮軟不堅、卽前按之、沒指、其腹如鼓、爲皮水、然皮受寒鬱、故身腫而冷、真氣不用、通身皆腫、狀如周痺也、若見前脉證、或因入水而傷於心之營血、邪正凝結胸中、則窒痺着胃氣、則不能食、正氣不行而反聚痛、營血受傷、故暮躁不得眠、邪居營衛、鬱蒸汗出色黃、而爲黃汗耳、若見前脉證、痛在骨節、欬而喘者、卽是形寒、飲冷風寒傷於肺之表裏、而邪在表、則骨節痛在裏、則欬喘不渴、氣鬱不宜、其狀如腫、謂之

肺脹皮毛受邪故當發汗則愈蓋諸脉證皆當發汗然有渴者小便數者下利者邪已深入裏氣告虛津液已傷皆不可發汗矣

裏水者一身面目黃腫其脉沈小便不利故令病水假令小便自利此亡津液故令渴越婢加朮湯主之

方見中風

此風邪入裏合濕之證也風邪傷表入裏合濕風濕鬱蒸則一身面目黃腫似乎欲發黃汗而無汗出則不爲黃汗矣夫風濕鬱蒸衛陽羈滯不能決瀆故脉沉而小便不利水即泛於皮膚則病水矣

假令身腫而小便自利者、當責邪氣入胃、偏走前陰、津液內亡、而胃燥令渴、故以麻黃通陽、石膏善清胃中風化之熱、甘草和中、以桂枝薑棗宣通營衛、而驅風外出、加白朮健脾而燥濕也、

趺陽脉當伏、今反緊、本自有寒、疝瘕、腹中痛、醫反下之、卽胸滿短氣、○趺陽脉當伏、今反數、本自有熱、消穀、小便數、今反不利、此欲作水、

此兼宿疾致腫也、病水、趺陽脉當沉伏、今反見緊、本自寒、疝瘕、腹中痛、病、又因他病、醫反下之、觸動疝瘕之氣上奔、則胸滿短氣、蓋有他病下傷內陽、

決瀆無權、水泛皮膚、卽爲水腫、然有痼瘕日久、正氣衰憊、因他病下傷陽氣、精血凝滯、化而爲水、亦致水腫、故仲景以此預明、使人治腫、須審治別病、而後腹滿痛者、因治他病、而傷動痼瘕所致、或有先腹痛而後腫者、乃痼瘕自變爲腫也、○腫病、跌陽脉當伏、今反數者、胃中本自有熱、若不病消穀、則當小便數也、今反不利、乃胃中濕熱下流、壅閉胃關、以致膀胱氣化不利、水泛皮膚、故欲作水、蓋腫有誤施汗下、傷動痼瘕而變者、或胃熱消渴、傷腎而變者、須察其本而治其標、慎勿一概見腫而

遂○治○其○腫○也○

寸口脉浮而遲、浮脉則熱、遲脉則潛、熱潛相搏、名曰沈、跌陽脉浮而數、浮脉即熱、數脉即止、熱止相搏、名曰伏、沉伏相搏、名曰水、沉則絡脉虛、伏則小便難、虛難相搏、水走皮膚、即爲水矣、

此以寸口浮遲、跌陽浮數、互發陰陽、營衛受邪、而致水腫、即關格之義也、脉經云、浮而遲大爲虛脉、然虛爲血虛、今之寸口脉浮而遲、即知血虛氣熱、而受邪也、寸口主肺、而法天、肺氣熱而受風、其脉則浮、衛邪拒格、營氣不和、衛不獨行、而脉遲矣、風

氣化熱爲浮脉則熱陰氣伏而不與陽和爲遲脉
則潛言風爲外熱陰自內潛卽關格之義也營衛
不和合而言之熱潛相搏名曰沈沈乃衛邪拒格
營氣不和而爲沉非脉之沉也跌陽主胃而法地
胃氣受邪其脉則浮衛盛營弱而脉則數營虛衛
盛則脉浮而數然邪氣化熱爲浮脉卽熱營沉不
與衛和爲數脉卽止是衛氣熱浮於上營血沉止
於下衛浮營止兩不相和合而言之爲熱止相搏
名曰伏乃陽孤自化爲熱陰孤伏化爲水此亦關
格之義也蓋衛陽拒格營氣下潛爲沈營氣內止

化水爲伏、營衛不和、合而言之爲沉伏相搏、名之曰水。總言衛氣邪強而不運轉、營血伏化爲水。此亦見關格之義也。夫絡脉屬陽、陽氣受邪而強、真不充、絡曰沉、則絡脉虛、營不附衛而行、伏化爲水、泛溢皮膚、不行於小便、曰伏、則小便難。然陽不充、絡則絡脉虛、營止化水、溢於絡脉、則水道不行而小便難。但絡空便難、合而言之、虛難相搏、水走皮膚、卽爲水矣。

寸口脉弦而緊、弦則衛氣不行、卽惡寒、水不沾流、走於腸間。

此互風挾積寒、正水之脉也、脉弦偏於緊者、乃肝臟受風、腎臟受寒、鬱伏於內、衛氣不行於外、則惡寒、三焦不能決瀆、水飲不隨衛氣走於小腸而傳滲膀胱、則不得不泛濫於皮膚、故爲水不沾流、走於腸間也、

少陰脉緊而沉、緊則爲痛、沉則爲水、小便卽難、此腎臟獨受寒邪內鬱而爲正水也、少陰腎脉緊則寒邪凝滯、正氣於內曰緊、則爲痛、沉則衛氣鬱而不宣、三焦壅閉、水卽泛濫、曰沉則爲水、決瀆無權、小便卽難、卽絡空便難之謂也、

脉得諸沉、當責有水、身體腫重、水病脉出者死、
此脉沉爲水、浮則爲反也、脉得諸沉、沉爲氣鬱、不
行於表、則絡脉虛、虛卽水泛皮膚、肌肉故身體腫
重、當責有水、但沉爲正水、而正水乃陰盛、陽鬱、脉
必沉極、若陡見浮起、是真氣離根、外脫之象、故曰
水病脉出者死、若風皮二水、脉浮而洪、不在此例
也、

夫水病人、目下有臥蠅、面目鮮澤、脉伏、其人消渴、病
水、腹大小便不利、其脉沉絕者、有水、可下之、
此水病脉伏沉絕者、當治標救陽也、若水外走、則

反蓋於皮膚肌肉內逆則浸淫於臟腑腸胃相隨
胃脉上注於面目下如臥蠶之狀水主明潤而光
亮故面目鮮澤爲水病之驗也然水病因陽微陰
盛經隧不利所以脉伏而胃中津液水飲外溢皮
膚肌肉不漑喉舌故作消渴誠非真消渴也若病
水腹大而小便不利脉沉或絕乃陰盛陽鬱而不
決瀆則陽機將欲盡滅故曰可下俾水去陽回而
元自復矣

問曰病下利後渴飲水小便不利腹滿因腫者何也
答曰法當病水若小便自利及汗出者當自愈

傷寒差後、有水氣一證、此因下利後、渴欲飲水而致腫也、但下利必傷津液、及腎中陰水、故渴欲飲水、而飲入於胃、脾氣散精、乃爲常度、此因下利致傷脾胃、土虛不運、日飲之水、不循膀胱橫行皮膚、故小便不利、當病水矣、若元氣復而健運如常、衛氣通行、小便利而水不復聚、或表間汗出、故當自愈、此利後致腫、元氣易復、非似陽虛陰結難治之比也、

心水者、其身重而少氣、不得臥、煩而躁、其人陰腫、○肝水者、其腹大、不能自轉側、脇下腹痛、時時津液微

生小便續通○肺水者其身腫小便難時時鴨溇○脾水者其腹大四肢苦重津液不生但苦少氣小便難○腎水者其腹大臍腫腰痛不得溺陰下濕如牛鼻上汗其足逆冷面反瘦

此明水腫有屬五臟也七情內傷五臟風寒侵入閉塞經隧水氣泛濫爲腫故仲景示人先察何臟受傷而爲治病之本則險證可活若概以脾肺腎通套成方則死危莫計矣蓋心因暴喜或憂思傷而受邪脾失母氣之廕陰盛陽微水寡於畏挾木乘脾泛濫肌肉則身重少氣脾虛胃氣亦逆故不

得臥、陰邪上逆、逼迫神明、則煩而躁、陽鬱不行、水
凝於下、故陰腫也。○肝因暴怒鬱遏而傷、外邪侵
襲、氣閼不開、木鬱不達、脾氣壅而化機不轉、水寡
於畏、外入之水、並挾腎水泛濫中州、其腹則大水
逆肝經、兩脇不能轉側、而氣連少腹、故脇下腹痛、
蓋肝主疎泄、雖被水淫、而生機尚未全息、故上疏、
則津液微生、下泄則小便續通、第不似平人之疎
泄耳。○肺因憂思氣結傷之、而受邪、木寡於畏、肆
逆土中、寒水以乘、木勢橫流、皮肉故身腫、肺不通
調、則小便難、水穀混走腸間、時時鴨漉、鴨漉者如

鴨糞。滑。稀。而。不。實。也。○脾。因。思。慮。所。傷。或。飲。食。不。節。氣。虛。受。邪。水。反。橫。滯。於。肌。肉。四。肢。腹。大。而。四。肢。苦。重。蓋。脾。爲。生。化。之。源。水。泛。於。脾。生。機。不。轉。故。津。液。不。生。而。苦。少。氣。然。母。病。子。亦。病。肺。氣。不。能。下。輸。膀。胱。小。便。難。也。○腎。因。驚。恐。房。勞。或。坐。臥。濕。地。致。傷。腎。水。或。傷。真。陽。而。受。風。寒。皆。可。致。水。蓋。少。陰。爲。樞。腎。傷。則。開。閤。失。職。胃。關。不。利。胃。中。津。液。不。飲。不。行。泛。濫。皮。膚。肌。肉。其。腹。故。大。蓋。臍。內。丹。田。真。氣。所。居。但。真。陽。傷。而。氣。不。收。攝。則。臍。腫。而。腰。痛。不。得。溺。陽。鬱。於。下。濕。熱。鬱。蒸。津。水。滲。於。陰。囊。之。外。所。以。濕。

如牛鼻上汗、晝夜漿漿不乾、陽不達於足而逆冷、不充於面、營血亦不上升、則面反癢耳。

論曰、經謂脾肺腎三臟爲致水之源、後人不離通調水道、健脾補陽制水而爲治法、此仲景重拈五臟之水、真補軒岐未備、使人達本尋源、察其致病之臟虛實治之、弗拘脾肺腎通套成方、則治腫爲善。

師曰、諸有水者、腰以下腫、當利小便、腰以上腫、當發汗、乃愈。

此以腰之上下分陰陽、卽風皮正水之兩大法門。

也。腰以下主陰，水亦屬陰，以陰從陰，故正木勢必起於下部，先腫卽腰已下腫，然陽衰氣鬱，決瀆無權，水逆橫流，當開門戶以利小便，則愈。經謂潔淨府是也。腰以上主陽，而風寒襲於皮毛，陽氣被鬱，風皮二水勢必起於上部，先腫卽腰以上腫，當開腠理，取汗通陽，則愈。經謂開鬼門是也。竊謂利水發汗，乃言其常而末及其變，當審實者施其常，虛者施其變，但治變之法，欲汗者當兼補陽，卽麻黃附子湯之類；欲利小便者當兼養其陰，卽五苓散加地黃、桂枝，或括婁瞿、麥九之類。然開腠通陽而利

小便必兼變法乃爲第一義耳。

師曰寸口脉沉而遲沉則爲水遲則爲寒寒水相搏跌陽脉伏水穀不化脾氣衰則驚澹胃氣衰則身腫少陽脉卑少陰脉細男子則小便不利婦人則經水不通經爲血血不利則爲水名曰血分。

此以先後二天辨風寒侵襲血室精血化而爲水也寸口主氣沉爲陽氣內鬱鬱則絡脉空虛陰水泛溢皮膚故沉則爲水元陽氣虛虛則脉遲爲寒寒則陽虛水泛日寒水相搏卽寒水侵於脾胃後天陽氣不伸故跌陽脉伏是因陰盛陽虛所以水

穀不化、第不化有二。若脾陽虛而健運失常所致者、則內爲驚、澹、若胃陽衰而不化、卽胃氣不充於肌肉、膚腠空虛、水邪泛溢、則爲身腫、可見水腫無有不兼胃陽虛而所致也。又以先天腎氣辨之、若右尺少陽脉卑、卑者卽沉而弱、相火衰而爲病也。或左尺少陰脉細、細則微而損、水之虛而爲病也。二脉同屬下焦、第分陰虛、陽鬱而受風寒、水濕侵淫、氣血爲病、故以少陰主陰、少陽主陽而別陰陽。風寒虛實之兩途、若病在男子、則精血不流、凝化爲水、而小便不利、在婦人、則胞門血寒、凝水凝化。

爲水而經爲血。血不利則爲水。雖有男女之分。總皆屬於陰。凝陽鬱不宣。故曰血分。

問曰。病者苦水。面目身體四肢皆腫。小便不利。脉之不言水。反言胸中痛。氣上衝咽。狀如炙肉。當微欬喘。審如師言。其脉何類。師曰。寸口脉沉而緊。沉爲水。緊爲寒。沉緊相搏。結在關元。始時尚微。年盛不覺。陽衰之後。營衛相干。陽衰陰盛。結寒微動。腎氣上衝。咽喉塞噎。脇下急痛。醫以爲留飲。而大下之。氣繫不去。其病不除。復重吐之。胃家虛煩。咽燥欲飲水。小便不利。水穀不化。面目手足浮腫。又與葶藶丸下水。當時如

小差、食飲過度、腫復如前、胸脇苦痛、象若奔豚、其水揚溢、則欬喘逆、當先攻擊衝氣、令止、乃治、欬欬止、其喘自差、先治新病、病當在後、

此水病積寒爲根、兼示誤治之變也、病者、面目身體四肢皆腫、小便不利、乃水腫、本有之證、但病者竟不言此、反言胸中痛、氣上衝咽、狀如炙肉、當微欬喘、然水病不當有此而見之、故問其脉何類、蓋寸口主氣、氣虛則脉沉、沉則水聚、曰沉爲水、寒邪入營、邪正相搏、則脉緊、曰緊爲寒、此因陽虛以挾腎間積寒而爲病根、以致諸標之證也、然水寒內

結爲沉緊相搏而邪結關元陽氣未衰正勝於邪始時尚微年盛不覺日久陽衰始露陽損陰盛結寒微動相干營衛矣然積寒不能獨自上升必挾腎陰衝於心包則胸中痛逆於衝脉則氣上衝咽侵於任脉上至咽喉狀如炙肉入肺則欬喘而咽喉塞噎衝脇則脇下急痛是隨虛處縱橫傳變爲病而醫不識內挾舊邪誤認畱飲而大下反傷中氣所以衝氣不去水病不除復重吐之誅伐無過傷竭津液則胃家虛煩咽燥欲得飲水此水腫陰病而反添陽燥庸工目眩心迷正未易識所以吐

下之後水愈泛而小便不利水穀不化面目手足
浮腫又與葶藶丸下水然葶藶丸但下水腫之標
不能除水之本故但小差而不盡徹稍有食飲過
度腫復如前胸脇苦痛象若奔豚其水揚溢衝氣
欬喘種種復發而新添衝氣原因積寒所致當以
溫經下逆之藥攻擊衝氣令止故曰先治新病俟
衝氣止而欬喘之標自差謂病當在後也
風水脉浮身重汗出惡風者防已黃芪湯主之腹痛
者加芍藥

此風水挾濕風多爲表虛而出方也前云脉浮而

洪沉而滑、浮而緊、是兼風寒火濕而然。此風邪也。濕在表、故脉浮。水濕傷肉、則身重。表虛自汗、則惡風也。但有汗、不可更汗。所以防已通腠理而祛周身風濕。黃芪固衛實表、卽是散邪。以朮草健脾除濕而助防已之力。更倍薑棗和營衛而送表裏之邪外出。腹痛者、風氣乘脾、加芍藥以疏土中之木。防已黃芪湯。

防已 一兩

黃芪 一兩

白朮 三分

甘草 五錢

右剉每服五錢、生薑四片、大棗三枚、水盞半、煎八分、溫服、良久再服。

風水惡風、一身悉腫、脉浮不渴、續自汗出、無大熱、越婢湯主之。

此風多水少之證也。風多傷表，外應肌肉，內連及胃。故惡風，一身悉腫，胃氣熱，蒸其機，外向不渴而續自汗出。無大熱者，則知表有微熱而爲實也。故以麻黃通陽氣而散表，石膏入胃能治氣強壅逆，風化之熱，甘草薑棗以和營衛。若惡風者，陽弱而爲衛虛，故加附子，錄驗加朮並驅濕矣。

越婢湯

麻黃

六兩

石膏

半觔

生薑

三兩

大棗

十五枚

甘草二兩

右五味以水六升先煮麻黃去上沫內諸藥煮取三升分溫三服惡風者加附子○風水加木四兩

古今錄驗

裏水越婢加朮湯主之甘草麻黃湯亦主之

此風水深入肌肉則一身面目黃腫非臟腑之裏也裏水乃表裏相連胃熱內向腠實無汗故以越婢加朮湯清熱開腠培土散邪而麻黃甘草湯亦通陽達表培中而和營衛使陽通則風從外散水從下滲此方但與無汗面目黃腫宜之若自汗忪

津液者不可輕試。當識有汗無汗分治耳。

甘草麻黃湯

甘草 二兩

麻黃 四兩

右二味以水五升先煮麻黃去上沫內甘草煮取三升溫服一升重覆汗出不汗再服慎風寒水之爲病其脉沉小屬少陰浮者爲風無水虛腫者爲氣水發其汗卽已脉沉者宜麻黃附子湯浮者宜杏子湯

此以正水並腎氣水而出方也沉爲氣鬱水聚小爲陽虛陰盛邪鬱腎中精而不流故脉沉小爲

屬少陰。此卽寒結正水之脉也。若小而浮者，乃腎間陽分受風。經謂腎風之風，木乃與寒結對待而言也。或無水虛腫者，卽肺氣壅逆而腫，故爲氣水。經謂之皮水也。蓋氣水邪在肌膚，當發汗通陽，開鬼門卽已。然沉小乃少陰陽虛陰盛，致水而水源在腎，故發汗通陽之中，是又不侔。所以麻黃附子湯中，以附子固護表裏之陽，且助麻黃甘草通陽散邪，俾邪出而真陽不出，卽開鬼門之變法也。蓋麻黃附子湯，今人置之不講，余特舉而明之。第水病始得之源，未有不從腎虛而受風寒鬱在衛氣。

胃。關。不。利。水。邪。泛。溢。以。致。通。身。腫。滿。故。當。補。陽。之。
中。兼。用。輕。浮。通。陽。開。鬱。利。竅。之。劑。則。真。陽。宣。而。邪。
自。去。正。謂。不。治。水。而。水。自。愈。所。以。麻。黃。附。子。一。散。
一。補。固。本。通。陽。則。病。去。而。不。傷。陽。氣。之。妙。今。人。不。
知。通。陽。開。竅。惟。用。腎。氣。湯。丸。陰。重。陽。輕。之。劑。壅。補。
其。內。陽。氣。愈。益。不。宜。轉。補。轉。壅。邪。無。出。路。水。腫。日。
增。因。藥。誤。事。不。知。凡。幾。矣。蓋。脉。浮。者。邪。居。氣。分。而。
屬。肺。詳。杏。子。湯。必。以。杏。子。爲。君。而。杏。乃。喘。瀉。肺。氣。
使。肺。氣。通。調。邪。去。而。腫。自。退。方。雖。遺。失。意。想。可。知。
也。

麻黃附子湯

麻黃 三兩

甘草 一兩

附子 一枚

右三味以水七升先煮麻黃去上沫內諸藥煮取二升半溫服八合日三服
杏仁甘草石膏湯
杏子湯 林億曰未見恐是麻黃杏

皮水為病四肢腫水氣在皮膚中四肢聶聶動者防已茯苓湯主之

此邪在皮膚而腫也風入於衛陽氣虛滯則四肢腫經謂結陽者腫四肢即皮水也皮毛氣虛受風而腫所謂水氣在皮膚中邪正相搏風虛內鼓故

四肢聶聶動是因表虛也蓋肺與三焦之氣同入
胸膈而行決瀆此肺虛抑鬱不入胸膈而水亦不
行則當使小便利而病得除故用防已茯苓除風
濕而宣水道以黃芪補衛而實表氣表實則邪不
能容甘草安土而制水邪桂枝以和營衛又行陽
化氣而實四末俾風從外出水從內洩矣

防已茯苓湯

防已

黃芪

桂枝

各三兩

茯苓

六兩

甘草

二兩

右五味以水六升煮取二升分溫三服

厥而皮水者蒲灰散主之

方見小便不利中

經謂寒氣客於皮膚之間、慄慄然不堅、爲皮水。此
出二條、卽前之肺水、因風熱壅於皮膚、而有虛實
之分、與內經不符、蓋風熱壅抑皮毛之氣、邪正內
鬱、機不外向、故手足厥而身腫、乃皮水之實證也。
然氣壅不當補陽而再壅其氣、所以不用前湯、而
以蒲蓆燒灰、合滑石涼滑、以利週身之竅、俾竅通
則皮水厥而自退矣。

師曰、寸口脉遲而濇、遲則爲寒、濇爲血不足、跌陽脉
微而遲、微則爲氣遲、則爲寒、寒氣不足、則手足逆冷、
手足逆冷、則營衛不利、營衛不利、則腹滿脇鳴、相逐

金匱要略 卷一 三
氣轉、膀胱營衛俱勞、陽氣不通、卽身冷、陰氣不通、卽
骨疼、陽前通、則惡寒、陰前通、則痺不仁、陰陽相得其
氣、乃行、大氣一轉、其氣乃散、寒恐是實字則失氣、虛則遺
溺、名曰氣分、

此心腎陰陽、胃中營衛、合病之大法也、寸主心火、
火虛則陽氣不足、故脉遲爲寒、而火虛則營血不
流、衛不獨行、故脉濇爲血不足、氣血皆虛、則脉遲
而濇也、又以趺陽脉辨營衛之虛實、微爲衛氣不
足、曰微則爲氣遲、爲陰盛、陽虛曰遲、則爲寒、而衛
虛、陰盛、營血不流、故手足逆冷、陰盛上逆、則腹滿

脇鳴邪隨經脉相逐氣轉則膀胱管衛俱勞經云
巨陽主氣爲諸陽所屬要知膀胱乃主周身陽氣
內行津液管衛外護皮毛肌肉若管衛俱勞滯而
不行陽氣不通則身冷陰氣不通則骨疼然雖不
通或飲食之氣充開膀胱之陽氣前通而營氣仍
自內鬱則惡寒或陰前通陽氣仍自不溫於分肉
則痺不仁必陰陽俱通管衛相和臆中宗氣一轉
大氣乃行痺着之邪相隨而去謂大氣一轉其氣
乃散而實者失氣邪從大便喧吹而泄虛者遺溺
邪從小便而去此陽虛氣滯化水而精血爲痺故

曰氣分

氣分、心下堅大如盤、邊如旋盃、桂、甘、薑、棗、麻、辛、附子、湯主之、

此氣分外腫內脹而出方也、心胃膀胱陽虛爲氣分、前言已悉、茲述其方、心下者、卽胃脘之上也、雖上焦宗氣虛而不佈、誠因中虛氣餒、衛氣虛而不運、以挾外飲之水、津液痰涎膠結於中、則心下堅大如盤、邊如旋杯、勢必外腫而內脹之篤、故以桂枝湯調和營衛而去酸收之芍藥、加附子細辛溫補上中下三焦之陽、兼逐水濕下行、以麻黃開腠

而通表裏之陽、俾汗出如蟲行皮中、則飲濕之邪去、而胸中堅大如盤、曠若太虛矣、下出水飲所作、枳木湯一方、乃內證似同、但身不腫爲異耳、

桂甘薑棗麻辛附子湯

桂枝

生薑

各三兩

甘草

二兩

大棗

十二枚

麻黃

二兩

細辛

三兩

附子

一枚

右七味、以水七升、先煮麻黃去上沫、內諸藥、煮取二升、分溫三服、當汗出如蟲行皮中、卽愈、
心下堅大如盤、邊如旋杯、
一作水飲所作、枳木湯主之、

此濕熱致痞與上條證同而因異也。脾胃氣虛風邪乘土風濕相搏氣虛不統津液水飲化爲痰飲而成痞滿。經謂太陰所至飲積中滿是也。仲景遠慮後人誤用桂甘薑棗麻辛附子之熱劑所以重出枳朮湯而示別之方。以枳實驅逐痰飲而瀉其實熱之滿。白朮健脾而燥濕補正也。蓋見心下堅大如盤當審虛實寒熱脉之浮沉遲數大小爲異毋得執方而誤用也。

枳朮湯

枳實 七枚

白朮 二兩

右二味水五升煮取三升分溫三服腹中與卽當
論曰靈樞云水始起目窠上微腫如蠶新臥起狀
其頸脉動時欬陰股間寒足脛腫腹乃大其水已
成以手按其腹隨手而起如裹水之狀此明正水
之最備也素問謂腎者胃之關也關門不利聚水
而從其類上下溢於皮膚則爲胛腫胛腫者聚水
而生病乃明腎受風寒而爲水病之根然下爲胛
腫大腹上爲喘呼不得臥者明其本在腎末在肺
皆積水也又曰勇而勞甚則腎汗出逢於風內不
得入於臟腑外不得越於皮膚客於立府行於皮

裏傳於腑、腫本之於腎、名曰風水、此言腎陽氣虛、受風而爲本腫、滿爲風水之標耳、有腎肝並浮爲風水、並沉爲石水、乃明風寒皆可致腫、當以脉之浮沉分別也、帝問、面胕麗然壅、害於言、不當刺、而刺後五日、其氣必至、至必少氣、時熱從胸背上至頭、汗出手熱、口乾苦渴、小便黃、目下腫、腹中鳴、身重、難以行、月事不來、煩而不能食、不能正偃、正偃則欬、名曰風水、乃腎風、誤刺傷陰、熱逆之變耳、蓋靈素發明邪入腎間之風水、而金匱以補風邪傷表之風水、謂其脉自浮、骨節疼痛、惡風者、脉浮而

洪氣強爲水者、沉滑中有水氣者、脉浮而緊、寒風傷表者、浮而遲、眞陽虛者、趺陽脉浮而數、風邪化熱者、種種之異耳、靈素謂正水不從毫毛生、而五臟陽已竭、津液充郭、其魄獨居、精孤於內、氣耗於外、形不可與衣相保、四極急而動中、是氣拒於內、形施於外、但言陽虛、津精血液化水之情狀、金匱以面目身體四肢皆腫、小便不利、脉之不言水、反言胸中痛、氣上衝咽、狀如炙肉、當微欬喘、寸口脉沉而緊、沉爲水、緊爲寒、沉緊相搏、結在關元、陽損陰盛、結寒微動、乃言積寒正水、而兼治逆之變也、

蓋不言風水之治逆、因內經言之已悉、故不復贅、
又謂寸口脉弦而緊、沉而遲、跌陽脉伏、少陽脉卑、
少陰脉細、爲血分、寸口脉遲而濇、跌陽脉微而遲、
肺胃皆寒而爲氣分、乃言腫滿、當分氣血而治之、
矣、靈樞曰、寒氣客於皮膚之間、瑩瑩然不堅、腹大
身盡腫、皮厚、按其腹、窅而不起、色不變、是爲膚脹、
金匱謂脉浮、肘腫、按之沒指、不惡風、其腹如鼓、不
渴、爲風熱抑鬱之皮水也、蓋內經治腫之法、謂平
治權衡、去菀陳莖、是以微動四極、溫衣、繆刺其處、
以復其形、開鬼門、潔淨府、精以時復、五陽已布、疎

滌五臟、故精自生、形自盛、骨肉相保、巨氣乃平、爲
治水腫表裏陰陽虛實寒熱之大法也、然金匱推
廣其義而明諸治、故用越婢湯治脉浮不渴之風
水、加朮湯治風入之裏水、防已黃芪湯治汗出表
虛之風水、甘草麻黃湯治風入無汗之裏水、防已
茯苓湯治熱鬱之皮水、蒲灰散治風熱鬱抑手足
厥而之皮水、麻黃附子湯治少陰脉沉陽虛受寒
之正水、又補風寒暑濕六淫內侵五臟皆致腫疾、
而仲景補素問未發之旨、欲後人窺其立方之意、
臨證化裁、自能處方、方爲入彀耳、

附方

外臺防已黃芪湯治風水脉浮爲在表其人或頭汗出表無他病病者當下重從腰已上爲和已下當腫及陰難以屈伸

方見前

此乃濕從下受濕多風少故用黃芪實表使水不得上溢以防已驅除風濕术草健脾葶棗以宣營衛俾營衛和而濕自除矣

黃汗

問曰黃汗之爲病身體腫重一云發熱汗出而渴狀如風水汗沾衣色正黃如蘗汁脉自沉何從得之師曰

以汗出入水中浴，水從汗孔入得之，宜黃芪芍藥桂酒湯主之。

此傷水濕爲黃汗之根也。衛虛營弱，汗出入水，水傷心主之營，壅滯三焦所主之氣，營衛兩傷，邪正相合，氣滯於表，故身腫發熱。濕熱內蒸，營氣外越，則汗出也。汗乃營血津液所化，洩傷津液，則渴然身腫發熱。汗出謂狀如風水，第汗出沾衣，黃如藥汁，脉沉與風水爲異耳。因汗出毫竅盡開，入水則從汗孔而傷營血，風濕蒸騰而成黃汗，故以黃芪實表驅邪，桂酒芍藥宣血而和營衛，俾正氣實而

邪自去不治汗而汗自止矣

黃芪芍藥桂酒湯

黃芪

五兩

芍藥

三兩

桂枝

三兩

右三味以苦酒一升水七升相合煮取三升溫服一升當心煩服至六七日乃解若心煩不止者以苦酒阻故也

一方以美酒
臨代苦酒

黃汗之病兩脰自冷假令發熱此屬歷節食已汗出又身常暮盜汗出者此營氣也若汗出已反發熱者久久其身必甲錯發熱不止者必生惡瘡若身重汗出已輒輕者久久必身瞶瞶即胸中痛又從腰已上

汗出下無汗腰臃弛痛如有物在皮中狀劇者不能食身疼重煩躁小便不利此爲黃汗桂枝加黃芪湯主之

此辨黃汗傳變營衛諸證也汗出入水水傷心屬所主之營然水氣通於腎腎水應接亦受其邪水挾腎陰上逆心脾使營衛之氣則不下達故兩脰自冷卽難經腎主濕入心爲汗足脰寒而逆是也腎濕上逆心脾濕熱鬱蒸營氣外越則爲黃汗汗傷營而表裏有邪所以發熱若脰不冷便爲歷節矣蓋飲食入胃穀與邪氣鬱蒸營氣外越則食已

汗出邪入於營故暮常盜汗此汗乃營氣所化也。因汗出營虛故反發熱正虛邪實久則營血枯竭身必甲錯甲錯者如魚鱗乾枯之狀也。營虛則發熱不止邪氣逆於肉理營衛不利必生惡瘡身重汗出已輒輕者邪從汗泄暫覺輕舒但真氣不充肌肉久久必身瞢瞢者氣虛肌肉蠕動是也。邪氣上逆營衛不利卽胸中痛衛虛則汗從腰已上有營閉下焦故無汗而腰腕弛痛如有物在皮中堅硬不仁矣若劇者胃氣亦傷則不能食而身體疼重因黃汗出而洩傷陰血邪氣上逆於心故

煩躁而小便不利方用桂枝湯加黃芪和營衛以固表氣俾正氣足而邪自散矣

桂枝加黃芪湯

桂枝

三兩

芍藥

三兩

甘草

二兩

生薑

三兩

黃芪

二兩

大棗

十二枚

右六味以水八升煮取三升溫服一升須臾飲熱稀粥一升餘以助藥力溫覆取微汗若不汗更服

張仲景金匱要畧卷十五

樵李沈明宗月南甫編訂

黃癰

緩浮則爲風，緩則爲痺，痺非中風，四肢

鍾。遊。風。蒸。散。痺。也。寸。口。主。氣。氣。分。受。邪。其。脉。則。浮。
 由。浮。則。爲。風。而。緩。脉。爲。濕。此。風。多。於。濕。故。脉。浮。而。
 緩。風。濕。鬱。結。邪。正。爲。痺。痺。者。閉。也。因。風。拒。閉。營。衛。
 爲。痺。非。內。經。風。寒。濕。三。氣。之。痺。謂。痺。非。中。風。但。風。
 入。脾。胃。風。濕。鬱。蒸。邪。化。爲。熱。而。越。於。外。四。肢。苦。煩。

卽風淫末疾之義然脾鬱困極真色走於肌膚脾色必黃故爲瘵熱以行

跌陽脉緊而數數則爲熱熱則消穀緊則爲寒食卽爲滿尺脉浮爲傷腎跌陽脉緊爲傷脾風寒相搏食穀卽眩穀氣不消胃中苦濁濁氣下流小便不通陰被其寒熱流膀胱身體盡黃名曰穀瘵

此以跌陽脉辨痺病在於脾胃也痺病始於脾胃故以跌陽脉辨見脉緊而數者緊爲寒邪傷營而入脾數爲風邪傷衛入胃而化熱然胃風化熱爲熱則消穀脾寒不磨食則爲滿寒熱壅逆正氣不

能宣行脾濕下流致傷腎水曰尺脉浮而傷腎然
外寒傳入脾胃而寒屬陰以陰從陰則跌陽脉緊
爲傷脾乃脾受寒而胃受風表裏通氣故爲風寒
相搏若脾單受寒而胃單受風與內濕相合皆致
成痺非盡受風寒也但食穀入胃風熱互蒸上衝
於目故食穀卽眩寒邪傷脾穀氣不消津液停滯
於胃化爲苦濁濁氣下流膀胱濕熱壅閉則小便
不通也若脾之寒濕下流於腎爲陰被其寒或胃
中風濕流於膀胱則爲熱流膀胱氣鬱熱蒸黃色
走於肌表則一身盡黃矣此因酒食穀類內傷脾

胃招邪致病故曰穀痺然非盡屬風寒兩受所致
乃明或風或寒侵入脾胃而合內濕以致成痺此
仲景立言章法之妙諸篇類皆如此

師曰病黃痺發熱煩喘胸滿口燥者以病發時火劫
其汗兩熱所得然黃家所得從濕得之一身盡發熱
而黃肚熱熱在裏當下之

此以火劫他病致痺也火熱以挾外邪入裏與內
濕相合表未解而裏熱熾盛故發熱煩喘胸滿口
燥火濕相蒸爲從濕得之故身發熱而黃也蓋太
陰主腹外邪傳裏太陰受之則肚熱爲熱在裏故

當下之卽梔子大黃湯之意也

脉沈渴欲飲水小便不利者皆發黃

此言他病將變發黃也邪熱傳裏故脉沈而渴欲飲水濕熱鬱於中宮氣不下達則小便不利熱蒸外越勢將發黃也

腹滿舌

疑是身字

痿黃燥不得睡屬黃家

此熱鬱於內也邪傳太陰濕熱鬱蒸則腹滿身痿而陽明熱逆則津血枯燥土色外越故黃燥不得睡爲屬黃家

黃疸之病當以十八日爲期治之十日已土瘥及劇

爲難治

此取陽病陰和、陰病陽和爲大綱也。十八乃三六陰數之期也。十日者二五陽土之數也。黃痺乃濕熱鬱蒸、陽邪亢極、脾陰大衰、故治之須候一六二六三六陰氣來復、制火之期而爲定期。若至十日已上、土陰氣復則當瘥而反劇者、乃脾陽亢極、陰機化滅、故爲難治。

痺而渴者、其痺難治。痺而不渴者、其痺可治。發於陰部、其人必嘔。陽部、其人振寒而發熱也。此言表病易治、裏病難治也。胃中濕熱、蒸越皮膚、

則一身盡黃雖發於外當以表裏陰陽辨證則知
可治與難治若痺而渴者邪雖外越胃中濕熱半
居於內耗竭津液則渴津枯血燥陽火亢極表裏
皆邪故曰難治不渴者熱邪一發盡越於表裏無
餘蘊一解表而卽散故曰可治然邪在胸膈胃腑
之裏爲發陰部內逆上衝其人必嘔其邪盡發皮
穀之表爲陽部乃太陽所主故振寒而發熱也
陽明病脉遲者食難用飽飽則發煩頭眩小便必難
此欲作穀痺雖下之腹滿如故所以然者脉遲故也
此乃傷寒論中正虛邪實致痺也陽明病而見脉

遲者。是因脾濕氣虛而不健運。故食難用飽。飽則風熱壅遏於胃上衝。則發煩頭眩。流於胸臍。則小便難。風濕鬱蒸不散。欲作穀瘴。然正虛邪實。不當下而下之。則正愈虛。而邪愈盛。腹滿如故。察其所。以然者。因氣虛脉遲所致故也。

穀瘴之病。寒熱不食。食即頭眩。心胸不安。久久發黃。爲穀瘴。茵陳蒿湯主之。

此穀瘴證而出方也。邪在太陽之表。當發寒熱。而能食。此濕熱在胃。流於所勝之胸臍。故寒熱不食。食則胃邪上衝。而爲頭眩。濁氣內壅。所以心胸不

安不安者卽懊懣熱痛之類也。濕熱已自鬱蒸，相
延日久，必致發黃而爲穀瘡。故用茵陳苦寒善解
表裏之濕熱，梔子性涼能瀉屈曲之火下行，以大
黃微利而助梔子開鬱解熱，擊其半渡而已。

茵陳蒿湯

茵陳蒿

六兩

梔子

十四枚

大黃

二兩

右三味以水一斗先煮茵陳減六升，內二味煮取
三升，去滓分溫三服。小便當利，尿如皂角汁狀，色
正赤，一宿腹減，黃從小便去也。

心中懊懣而熱不能食，時欲吐，名曰酒瘴。

前云穀食傷於脾胃招邪而爲穀痺此傷酒濕招邪故爲酒痺酒味濕熱鬱蒸中宮上衝於心陽火不寧則心煩愴懣而熱濕熱壅胃故不能食邪機上逆則時欲吐欲吐者乃欲吐而不能吐也若肌皮未黃而見此證卽是欲發酒痺之徵矣

夫病酒黃痺必小便不利其候心中熱足下熱是其證也

此補上條酒痺之未備也酒爲熟穀之液其毒入胃先傷其陰濕熱互蒸而爲黃痺然母病移子肺亦受熱不得通調水道下滲膀胱故必小便不利

或胃熱流於胸臆亦不利也邪熱衝心則心中熱下耗腎水則足下熱若酒客在他病而見小便不利心熱足熱卽知將成瘴證矣

酒黃瘴者或無熱靖

恐是清字

言了了腹滿欲吐鼻燥其

脉浮者先吐之沉弦者先下之

此酒瘴當分濕熱多少而治也外無惡寒發熱裏無懊懣譫妄神思不昏爲無熱清言了了而熱少濕多邪鬱於脾故腹滿欲吐風消津液上薰肺竅則鼻燥也當審脉之浮沉而施吐下則無誤治之患然浮者乃風多主病其性輕揚邪機上逆當先

吐之沉弦者屬陰在裏乃濕多主病濕性濁而下流故當下之即梔豉茵陳蒿湯之類也然詳先字要知吐下之後再以清解餘熱不待言矣

酒痺心中熱欲吐者吐之愈

此邪機上向之治也邪熱瀰滿於胃上衝胸膈之間則心中熱偏於風多濕少其機上行故欲吐也則當乘其上行之勢以從高而越之則邪去所以吐之愈

酒痺心中懊憹或熱痛梔子大黃湯主之

此酒痺而出方也酒熱之毒傷積於胃薰蒸心膈

之間則懊懣或熱痛其勢非輕若緩時日必傷心
血故用梔豉宜發在上之邪而清其標大黃枳實
蕩滌胃熱而下奪其本

梔子大黃湯

梔子

十四枚

大黃

一兩

枳實

五枚

豉 一升

右四味以水六升煮取二升分溫三服

酒瘴下之久久爲黑瘴目青面黑心中如噉蒜齏狀
大便正黑皮膚爪之不仁其脉浮弱雖黑微黃故知
之

此酒瘴大下而變證也酒瘴妄投大下傷動胃腎

津○精○血○氣○濕○熱○隨○虛○下○趨○腎○間○耗○竭○真○陰○膀○胱○氣○
鬱○腎○火○上○逆○變○爲○黑○瘰○也○然○腎○傷○則○肝○氣○亦○傷○肝○
主○色○發○露○於○外○所○以○肝○傷○則○血○不○上○榮○而○目○青○腎○
傷○則○陰○火○上○炎○而○面○黑○陰○水○既○虧○陽○光○獨○焰○於○心○
胃○之○間○濕○熱○薰○蒸○嘈○雜○酸○辣○譬○如○噉○蒜○齏○之○狀○但○
腎○傷○則○陰○火○煎○熬○故○外○證○面○黑○內○則○大○便○正○黑○是○
無○雜○色○相○兼○肺○傷○則○津○液○不○輸○於○皮○毛○而○皮○膚○黃○
燥○肝○傷○則○血○不○濡○筋○爪○之○不○仁○矣○蓋○瘰○病○邪○氣○在○
胃○是○當○下○奪○何○致○變○證○耶○然○酒○瘰○乃○熟○穀○之○液○陳○
腐○之○毒○胃○氣○先○傷○臟○腑○資○生○久○已○無○賴○所○以○一○下○

則諸臟盡傷故當嚴戒夫濕熱成癰脉得沈洪數大乃爲正氣不虧此傷陰血反浮弱矣若酒痺變黑其色必有微黃相兼較女勞傷腎純黑不同故謂雖黑微黃故知之耳

諸病黃家但利其小便假令脉浮當以汗解之宜桂枝加黃芪湯主之

方見水氣

此風多濕少邪機向表通治之方也諸病黃家乃胃中濕熱釀成而濕性下流當從下驅爲順故但利小便而爲常法假令脉浮則濕少風多而風性輕揚邪機在表當以汗解不可拘利小便爲常矣

故用桂枝湯和營衛而解肌表之邪。風爲表虛，加黃芪而實腠理，歆熱稀粥爲助，使周身微微小汗，則肌表之邪去，而雖有裏濕，亦從下滲矣。黃痺腹滿，小便不利而赤，自汗出，此爲表和裏實，當下之，宜大黃消石湯主之。

此邪居裏實，通治之方也。黃痺腹滿，小便不利而赤，濕熱壅逆中州極矣。但自汗乃表氣開通一面，爲表和裏實，然裏實必當下奪，故用大黃消石，善攻濕熱，瘀凝氣血之結。黃柏苦寒，以清下焦濕熱。梔子輕浮，能使上焦屈曲之火下行爲助也。

大黃消石湯

大黃

黃蘗

消石

各四兩

梔子

十五枚

右四味以水六升煮取二升去滓內消更煮取一升頓服

諸黃腹痛而嘔者宜柴胡湯

方見嘔

此風木乘土痛嘔出方也小柴胡湯原為傷寒傳入少陽邪高痛下而設此風熱挾木乘於脾胃鬱蒸發黃而為腹痛邪逆上衝則嘔故以小柴胡湯單提少陽厥陰風熱上行不令陷入土中為患則痛嘔自已再以清滲風濕之藥而和之可也

黃痺病茵陳五苓散主之

此黃痺小便閉塞氣分實證通治之方也胃中濕熱相蒸則一但有氣血風寒之分故後人有陰黃陽黃之別蓋胃爲水穀之海營衛之源風入胃家氣分風濕相蒸是爲陽黃濕熱流於膀胱氣鬱不化則小便不利當用五苓散宣通表裏之邪茵陳開鬱而清濕熱則黃自退矣

茵陳五苓散

五苓散見
痰飲中

茵陳蒿末

十分

五苓散

五分

右二味和先食飲方寸匕日三服

諸黃猪膏髮煎主之

此黃痺血分逆沲之方也。寒濕入於血分，鬱蒸氣血，不利證顯，津枯血燥，皮膚黃而暗晦，卽爲陰黃。當以猪膏潤燥，髮灰入血，和陰俾脾胃之陰得其和，則氣血不滯而濕熱自從小便去矣。蓋痺病皆因濕熱鬱蒸，相延日久，陰血必耗，不論氣血二分，皆宜兼滋其陰，故云諸黃主之。

猪膏髮煎

猪膏

半觔

亂髮

如雞子大三枚

右二味和膏中煎之，髮消藥成分再服，病從小便

出

黃痺病、小便色不變、欲自利、腹滿而喘、不可除熱、熱除必噦、噦者小半夏湯主之、方見痰飲

此濕多熱少氣虛之證也、小便黃赤如金、則爲黃痺、此小便色不變、欲自利者、肌表必是淡黃而不枯燥、乃濕鬱熱微、氣虛之證也、濕滯於脾、則爲腹滿、脾濕壅肺、則爲喘逆、然有濕無熱、不可再除其熱、但除熱之劑、必以苦寒而傷胃、陽則陰濕不行、化爲痰飲、上逆作噦、故以半夏生薑滌痰除飲而止噦、逆候噦止、再治其痺、要知小半夏湯、非黃痺

之專方、竊擬小半夏加茯苓湯可以善後耳、

男子黃、小便自利、當與虛勞小建中湯、

方見虛勞

此虛黃通治之方也、凡病黃、痺、小便極黃、不利、而爲實、此男子黃而自利、知無外邪壅滯所致也、其人必因飲食先傷、胃中營衛入房而傷、腎中之陰數擾其陽、相火衝於脾胃、濕熱合蒸、脾陰虧極、黃越於外、則顯肌膚黃燥、斯乃脾腎內傷所致、是無發表攻下之理、當以虛勞同治、故用小建中湯、補和胃中營衛、資生腎水、而鎮陽光、俾相火不乘於土、則不治黃而黃自退矣、

額上黑微汗出手足中熱薄暮卽發膀胱急小便自利名曰女勞瘵腹如水狀不治

此因女勞而成瘵也黃瘵由酒穀傷於脾胃相招外邪釀成已悉於前此由房勞傷腎陰水虧而陽火盛外邪襲入壅遏胃關脾胃濕熱聚而不化相火挾邪上逆於胃胃腎互蒸則額上黑而微汗出脾腎互蒸則手足中熱而肌膚黃黑蓋申酉陽明自旺濕熱下流膀胱與腎爲薄暮卽發證顯發熱惡寒此顯經病也若腑病則膀胱脹急矣陰精受邪氣分不爲邪阻故小便自利日久必致脾腎氣

血兩痺則腹脹滿曰腹如水狀即不治矣
黃家日晡所發熱而反惡寒此謂女勞得之膀胱急
少腹滿身盡黃額上黑足下熱因作黑痺其腹脹如
水狀大便必黑時澹此女勞之病非水也腹滿者難
治消礬散主之

此女勞證治之方也女勞痺亦因濕熱而成所以
概謂黃家必因房勞先傷腎水並及膀胱亦虛火
起下焦而爲女勞然腎關鬱而胃氣不轉日晡陽
明旺時濕熱下流腎與膀胱證顯發熱而反惡寒
膀胱脹急故少腹滿然膀胱主周身陽氣而受濕

熱鬱蒸達於皮膚則身盡黃腎水虛而陰火土勝則額上黑下流則足下熱夫黃爲土色黑爲腎色脾腎濕火互相蒸發則臉額與身之皮肉黃中帶黑而爲黑痺但房勞傷腎則胃關不利濕熱下趨膀胱相火則上逆於胃濕火互蒸故腹脹如水狀而腎火上入胃中逼迫渣滓下奔所以大便必黑而時溇此女勞致傷精血兩痺卒難解散是非水腫腹滿故曰難治方用消石鹹寒取其慄悍疾趨病所而清濕熱又逐熱瘀之血本草謂礬石能除痼熱深於骨髓以清腎與膀胱濕熱而消瘀結大

麥粥汁和服、引藥入胃、先清濕熱之源、俾痰熱不
得流腎爲患、日以三服、欲使藥力繼續、當使小便
微黃、大便微黑、則病隨大小便而去、曰小便正黃、
大便正黑、是其候也、

消礬散

消石

礬石

燒等分

右二味爲散、大麥粥汁和服、方寸匕、日三服、病隨
大小便去、小便正黃、大便正黑、是其候也、

論曰、飲食酒味、內傷脾胃、風寒襲入、濕熱鬱蒸而
成黃瘧、本之於胃、經謂已食如饑者、爲胃瘧、然邪

傷於胃。上逆則爲目黃。下流則溺黃赤。困鬱於脾。故安臥而爲黃痺。若外越則皮膚盡黃矣。金匱從胃而推廣其義。食傷爲穀痺。酒傷爲酒痺。房勞傷腎。胃腎互蒸爲女勞痺。補其脉證而兼治逆之變也。謂脉浮而緩者。乃胃濕挾風而言也。趺陽脉緊而數者。乃互風寒兩傷而言也。尺脉浮而傷腎者。土邪流剋於腎水也。趺陽脉緊爲傷脾者。以寒邪而從陰也。然濕邪上溢。食穀卽眩。而穀氣不消。胃中苦濁。濁氣下流。則小便不通。爲陰被其寒。熱流膀胱。身體盡黃。邪之陰陽各從其類也。心中熱而

懊憹、足下熱、目青面黑、如鰐鱗鱗狀、此乃熱多濕少、不能食、時欲吐、無熱、清言了了、腹滿而爲濕多、熱少、額上黑、微汗出、手足中熱、薄暮卽發、膀胱急、小便自利、爲女勞瘵、以消礬散去熱行瘀、大黃消石湯治肚熱內實之證、桂枝加黃芪以治病邪在表、濕熱內蒸、寒熱不食、以茵陳蒿湯而瀉之、酒濕盛而熱痛在心、梔子大黃以從下微濕從下受邪、在氣分者、以茵陳五苓而宣導之、邪傷血分、而以猪膏髮煎之潤虛黃、小便自利而色不變、用小建中湯、耑補營衛、或治逆而痰多、小半夏以爲救逆。

賊邪陷鬱於土而腹痛、柴胡湯可以升提、以上數條是明表裏陰陽寒熱虛實標本、乃治痺至精至妙之法、今之俗輩不讀金匱、記讀歌括、方書猶棄諸大海、認一浮漚而爲全潮矣、

附方

瓜蒂湯治諸黃、方見

瓜蒂湯吐藥也、若邪衝於胸膈、或心煩懊憹欲吐、而無他病者、當用此湯吐去黃水、因其高而越之也、

千金麻黃醇酒湯治黃痺、

外感風寒濕熱在表鬱會成黃或脉自浮當以汗
解者用此一味煮酒使其徹上徹下行陽開腠而
驅營分之邪則黃從表解矣

麻黃

三兩

右一味以美酒五升煮取二升半頓服盡冬月用
酒春月用水煮之